



N°1897  
Entrée le 05.02.2025  
Chambre des Députés  
Déclarée recevable  
Président de la Chambre des Députés  
(s.) Claude Wiseler  
Luxembourg, le 06.02.2025  
Chambre des Députés

Ministère de l'Agriculture, de l'Alimentation et de la Viticulture	8
Référence : 76/2025	
Le 6 Fev. 2025	
A traiter par :	
Copie à :	

Claude WISELER  
President vun der  
Chamber vun den Deputéierten  
19, um Krautmaart  
L-1728 Lëtzebuerg

Lëtzebuerg, den 05/02/2025

Här President,

**Sou wéi den Artikel 80 vun eisem Chambersreglement et virgesäit, bieden ech lech, dës parlamentaresch Fro un d'Ministesch fir Landwirtschaft, Ernährung a Wälbau weiderzeleeden.**

An de leschte Joren hunn ëmmer méi europäesch Länner d'Benotzung vu Fale mat Colle fir Nagedéiere verbueden. Ënner anerem hunn d'Belsch, England, Wales, Island a Spuenien dës Fale komplett verbueden, während Irland, Schottland an Neiséiland de Verkauf verbueden hunn. Dës Entscheedunge baséieren op der Erkenntnis, datt Fale mat Collen eng besonnesch grausam Method sinn, bei där d'Déieren dacks iwwer Deeg leiden ier se un Dehydratioun oder Ënnerernährung stierwen.

D'Problematik gëtt nach méi grouss well dës Falen net selektiv sinn. Nieft de Nagedéiere ginn och geschützt Aarte wéi Igelen a Fliedermais gefaangen. A verschiddeenen Nopeschlänner hunn dofir och schonn eenzel Geschäftsketten decidéiert, dës Produiten net méi ze verkafen.

An deem Zesummenhang wéilt ech der Ministesch dës Froe stellen:

1. Wéi ass déi aktuell legal Situatioun zu Lëtzebuerg betreffend d'Produktioun, de Verkauf an d'Benotzung vu Fale mat Colle fir Nagedéieren? Sinn dës vum Artikel 12 vum Gesetz vum 27 Juni 2018 couvéiert?
2. Wéi vill Fale mat Colle gi schätzungsweis all Joer zu Lëtzebuerg verkaf?
3. Gëtt et zu Lëtzebuerg dokumentéiert Fäll vu geschützten Aarten, déi an esou Fale gestuerwe sinn?
4. Plangt d'Regierung eng Gesetzgebung fir de Verkauf an d'Benotzung vu Fale mat Colle fir Nagedéieren ze reglementéieren oder ze verbidden?
5. Wéi eng Alternative recommandéiert d'Regierung fir eng méi human Kontroll vun Nagedéieren, besonnesch a Wunngebaier?

Mat déiwem Respekt,



[www.piraten.lu](http://www.piraten.lu)

CF

CLEMENT Sven

Deputierten

Ministère de l'Agriculture, de l'Alimentation et de la Pêche	
Référence : 8	
A traiter par :	
Copie à :	



[www.piraten.lu](http://www.piraten.lu)



**Äntwert vun der Ministesch fir Landwirtschaft, Ernährung a Wäibau op d'parlamentaresch Fro n°1897 vum éierbaren Deputéierten Sven Clement**

- 1. Wéi ass déi aktuell legal Situatioun zu Lëtzebuerg betreffend d'Produktioun, de Verkaf an d'Benotzung vu Fale mat Colle fir Nagedéieren? Sinn dës vum Artikel 12 vum Gesetz vum 27 Juni 2018 couvréiert?**

D'Punkte 16 a 17 vum Artikel 12 vum Déiereschutzgesetz (DSG) vum 27. Juni 2018 verbidden d'Doutmaachen oder d'Qual vun Déieren ouni Noutwendegkeet.

An deene Fäll, wou sou Produiten zum Asaz kommen, handelt et sech am Allgemengen em Schädlingsbekämpfung, sou datt d'Benotzung vu Fale mat Colle ënnert d'Noutwendegkeet vum Artikel 12 vum Gesetz vum 27. Juni 2018 fält.

Mir ass keent Gesetz bekannt, wou de Verkaf an d'Produktioun vun deene Fale gereegelt ass, d'DSG verbidd et net explizit.

D'DSG applizéiert sech parallel zu der Gesetzgebung iwwert Schädlingsbekämpfung.

- 2. Wéi vill Fale mat Colle gi schätzungsweis all Joer zu Lëtzebuerg verkaf?**

Et gi keng Donnéeën oder Statistiken iwwert de Verkaf vu Fale mat Colle zu Lëtzebuerg.

- 3. Gëtt et zu Lëtzebuerg dokumentéiert Fäll vu geschützten Aarten, déi an esou Fale gestuerwe sinn?**

Et gi keng Donnéeën oder Statistiken iwwert Fäll vu geschützten Aarten, déi an esou Fale gestuerwe sinn.

- 4. Plangt d'Regierung eng Gesetzgebung fir de Verkaf an d'Benotzung vu Fale mat Colle fir Nagedéieren ze reglementéieren oder ze verbidden?**

D'Déiereschutzgesetz ass de Moment an der Revisioun, an et wäert gepréift ginn, inwéiwäit et sënnvoll oder méiglech ass entspreichend Dispositiounen ze huelen.

- 5. Wéi eng Alternative recommandéiert d'Regierung fir eng méi human Kontroll vun Nagedéieren, besonnesch a Wunnebaier?**

Fir eng fir déi jeeweileg Situatioun ugepasste Kontroll vun Nagedéiere recommandéiert d'Regierung sech un e Fachgeschäft oder eng akkreditéiert Firma fir Schädlingsbekämpfung ze wenden an sech beroden ze loossen.

Lëtzebuerg, den 3. Mäerz 2025

D'Ministesch fir Landwirtschaft, Ernährung a Wäibau

(s.) Martine HANSEN